

Famia ta pidi pa discrecion y pa respeta paz di Sr. Jossy Brokke



Ayera tardi, abogado Doris Canwood den representacion di casa y yiu muhe di Sr. Jossy Brokke, a tene un conferencia di prensa pa cuestiona loke ta bin saliendo den otro medionan di comunicacion treci dilanti pa otro miembro di e famia, cu tin di haci cu e bida priva y salud di e artista Arubiano.

“Como miembronan di famia, nos ta lamenta esaki pasobra semper tabata nos deseo pa Jossy su dignidad y pa pueblo keda recorda Jossy manera e tabata prome cu el a bira malo, manera cu nos tur lo kier ser recorda mi ta kere si un di nos haya e malesa aki.” Canwood a bisa lesando e comunicado.

Igualmente, el a sigura cu door di e mesun malesa cu Sr. Brokke tin, no a keda nan nada otro cu lag’e bao cuidu di profesionalnan cu ta siguiendo instruccion door di dokternan cualifica y “no di cualkier hende.”

“Jossy no ta malo for di awor, pero a ser diagnostica door di dokternan cu a wake un par di aña pasa. Su casa no por cuid’e mas y door di cuida Jossy y negligencia su mes, el hasta a perde su brasa robes na augustus ultimo. Ta door di esey, hunto cu Sociale Zaken a pon’e den un cas di cuidu cu ta ser paga door di su casa. Famia Brokke no ta contribui financieramente na e cuidu di Jossy. Y cierto rumannan a purba, pero tampoco tabata

por cu e encargo; pero danki pa purba, esaki ta duro.”

Famia a mak mee cu nan deseo pa discrecion y paz pa Jossy no ta ser respeta, kier sak’e for di e cas di cuidu ki ora cu ta y pas’e bishita ki ora cu ta. Esaki no ta bon ni pa Jossy ni tampoco pa e otro clientenan di e cas cu tambe merece paz y privacidad. “Pasobra nan tambe no ta eynan por nada, vooral ora cu nos ta papia di bay te den cambenan pa graba y busca problema cu dunadonan di cuidu, strobando nan den haci nan trabao. Mientras tanto ta buscando e miho manera pa tene Jossy tranquil y na paz. Famia ta pasa bishit’e y ta pasa dianan agradabel cune, esey boso por a wak tambe



riba videonan cu terceronan a haci publico. Nos ta spera comprension di tur hende pa ten’e asina y nos ta spera cu no ta bay tin mas bishita inespera ki ora cu ta, caminda ta purba di mal usa bishita pa graba of laga documento pa ser firma door di personanan cu no tin capacidad mas pa haci esaki. Nos kier reitera cu no tin problema of guerra entre famianan, ni ta buscando manera pa bende propiedadnan manera ma tende awe, loke huridicamente no por, loke tampoco lo por pasa facil sin autorisacion di partidonan envolvi. Loke nos ta buscando pa nos ser kerí ta paz. E tin su dianan bon y e tin su dianan menos bon, nos lo keda steun, tanten cu tin forza y bida.”

Nan a gradici diferente famia pa nan sosten y na esnan cu ta contribuyendo cu e cuidu di Sr. Brokke y su casa Sandra, incluyendo dokter y enfermeronan.

Tocante si nan ta canando algun proceso legal pa Sr. Brokke, Canwood a señala cu te ainda no tin nada entrega na Corte.

Canwood a indica cu e famia a tuma contacto cune y involucr’e door cu cierto cosnan no a bay bon y cu esey no tin di haci cu e cuidu di Sr. Brokke. “Mi a ser involucra pasobra mi a compronde cu documentonan a ser firma y no a duna famianan e copia, a ser firma bao di un tipo di presion y nos kier sa kico tin eyden. Mi a pidi copia di e documentonan y te dia di awe mi no a hay’e. Si no tin nada di sconde, please famia kier sa kico a ser firma.”

Ademas, el a menciona cu tur hende cu ta den un cas di

cuidu tin derecho na su privacidad, ken mag y no mag di bishita ta ser coordina actualmente hunto cu e facilidad. “E limitacionnan no tin di haci cu e personanan mes, pero cu cosnan cu a pasa, incluyendo incidentenan na e cas di cuidu mes cu miembronan di cuidu envolvi,” el a bisa.

Ademas, el a trece dilanti cu tin cierto cosnan cu a ser bisa y haci door di e otro miembro di e famia na unda un persona cu ta forma parti di staf a ser agredi.

“Bay un conferencia di prensa y graba tur cos no ta e manera digno di salvaguardia e privacidad,” Canwood a sigura.

Ayera atardi, e medio di comunicacion local Masnoticia.com a realiza un video Live for di Pos Chiquito na unda e miembro di famia en cuestion a duna cierto declaracionnan, caminda el a keda prohibi pa drenta den cas di cuidu unda Sr. Brokke ta permanece, y pa e motibo ey a pidi presencia di Cuerpo Policial den e lugá.

Jossy Brokke ta un artista Arubiano masha conoci den mundo di arte y cultura na Aruba. Na e momentonan aki e tin 76 aña di bida y el a ser reconoci pa su 65 aña di farandula na aña 2021 cu un homenahe yama “T’ami ta Jossy, un homenahe na e voz di oro.” Ademas di esey el a gana e Premio Nacional Crioyo di Oro den mesun aña.

